

Obama 'korača' sa Izraelom

6 februar 2012 Izmijenjeno 07:35 CET

Američki predsjednik je rekao da Izrael nije donio odluku da li napasti Iran zbog nuklearnog programa te zemlje



Obama je naglasio da je cilj riješiti ovaj sukob diplomatskim putem [Getty]

Predsjednik SAD-a Barack Obama je rekao da ne misli da je Izrael donio odluku o tome treba li napasti iranska nuklearna postrojenja. Obama, u pokušaju da ponovo uvjeri Amerikance u navodnu prijetnju koju predstavlja nuklearni program Teherana, rekao je da Washington "korača" sa Izraelom da bi zaustavili Iran. "Ne mislim da je Izrael donio odluku" napasti iranska nuklearna postrojenja, rekao je Obama. Kada je upitan da li će se Izrael posavjetovati sa Washingtonom prije napada, on je rekao da ne može pričati o detaljima ali da ova dva saveznika "imaju jaku obavještajnu snagu i vojne konsultacije". "Moj prvi prioritet jeste sigurnost SAD-a. Ali također i sigurnost Izraela. I trudićemo se da zajedno koračamo i riješimo to, nadam se diplomatskim putem."

Diplomatski stisak

Obama je rekao da Islamska republika "osjeća stisak" sankcija međunarodne zajednice, te negirao zabrinutost da bi Teheran mogao odgovoriti napadom na SAD. "Bio sam veoma jasan – uradićemo sve da zaustavimo Iran da ne dođu do nuklearnog naoružanja u tako hirovitoj regiji", rekao je on. "Mobilizirali smo međunarodnu zajednicu na do sada neviđen način. Osjete oni taj stisak. Osjete pritisak", dodao je Obama.

Iran i dalje govori da je njihov nuklearni program namijenjen mirnodopskim svrhama.

Na pitanje da li će Teheran napasti američke mete, Obama je rekao: "Nemamo dokaze da imaju takvu namjeru ili kapacitete za to." Dodao je: "Naš cilj je da ovo riješimo diplomatski. To bi bilo bolje. Ali nećemo sklanjati ni tu mogućnost sa stola."

Izvor: Al Jazeera